



Dapi che Marc ha survegniu in narunchel d'in donatur gauda la famiglia Bearth bia dapli libertad, sco p.ex. cheu al Lag da Lugano – da san.: Sandra, Marc, Luca, Jan e Fabian.



Marc (amiez) va bugen a scola. El e ses frars Jan (dretg) e Luca ein buns amitgs.

FOTOS MAD

«Il «natalezi» dil narunchel da Marc ei ina fiasta da famiglia»

Ils 3 da schaner avon tschun onns ha Marc Bearth da Rabiun survegniu in narunchel d'in donatur e sa dapi lu viver ina veta relativamein normala. Oz ha Marc siat onns, el va ell'emprema classa e la transplantaziun digl organ ha midau la veta da si'entira famiglia.

SUSI ROTHMUND/FMR

Bia dapli libertad

Dapi sia naschientscha ei *Marc Bearth* staus in pazient ed il Spital d'affons a Turitg quasi siu secund dacasa. Il pop ha adina puspei stuiu supportar operaziuns perquei che ses narunchels luvravan buc endretg e la finfinala ei ina transplantaziun buca stada d'evitar. Las notgs cu el durmeva fuvu Marc vid igl apparat da dialisa e stueva vegnir nutriu sur la sonda. Il pignet ei vegniu silla gliesta da spetga da Swisstransplant e ha stuiu spigar nov meins. (LQ ha rapportau ils 27 da december 2017 e suenter adina puspei.) Ils 3 da schaner 2017, allas 01.45 la notg ha la famiglia Bearth finalmeins survegniu il telefon desiderau ch'ei detti in narunchel per Marc. Lu ha tut stuiu ir spert e gia allas 7.30 han ei giu d'esser a Turitg en spital. L'operaziun ei gartegiada bein e la fin schaner 2017 ha il pignet astgau turnar a casa tier ses frars.

«La transplantaziun ha midau la veta da nus tuts, nus havein gudignau enorm bia libertad e qualitat da viver. Marc duei crescher si aschi normal sco pusseivel», declara *Sandra Bearth*. Excursiuns seigien ussa meins cumplacadas ed era star sur notg enzanua auter che a casa seigi negin problem pli. Avon l'operaziun stuevien ei adina esser a casa dallas 17.30 entochen las 9.00. Marc ei bein in bien-ton pli pigns che ses cumpogns dall'annada e drova aunc regularmeins differents medicaments. Per gl'auter ei sia veta denton detg normala. «Ei dat dis ch'el senta ch'el ei auters, lu cloma el ora», declara la mumma. Aschia sappi il cateterisar magari stressar siu feagl. Marc possi halt buca semplameins zac, zac sponder aua sco ses amitgs e puspei turnar en scola ni a termagliar, tier el mondi quei tut empau pli ditg. Il plascher da viver dominescha denton e Sandra descriva Marc sco buob

«Nus havein gudignau enorm bia libertad e qualitat da viver.»

Sandra Bearth

intelligent e plein veta. L'operaziun ha midau sia veta, mo era quella dall'entira famiglia. Perquei ei il tschunavel giubileum lu era staus in di da fiasta per el, mo era per ses dus frars *Jan* e *Luca* ed ils geniturs *Sandra* e *Fabian*. Els ein stai quei di a scursalar, la «Grosi» ha semtgau in bien gentar e suenter han tuts dau giugs

ensem. Il di da fiasta ei ius a fin cun ina party da pizza e Luca, il frar pign, ha manegiau: «Quei ei stau il di il pli cool da mia veta.»

Marc drova bia liquid

Il narunchel da Marc deriva d'ina persuna carschida. Perquei ei quel relativameins gronds e drova dapli aua che quei ch'il pignet po beiber duront in di. Aschia survegn el adina era ina part dall'aua sur ina sonda, in survetsch che siu frar grond *Jan* fa detg bugen. Beiber avunda sto il scolar denton era en scola. Sco *Sandra Bearth* raquenta, ha sia scolasta dil fatg *Iris Nwachukwu-Casanova* anflau ina buna soluziun. «Iris metta il svegliarin sin certasuras e cu quel va giu beiba l'entira classa, quei fa era bein als auters», selegra ella. Insumma ei Marc bein acceptaus ed integraus e ha anflau massa amitgs. Perquei eis el era staus leds cu la scola ha puspei entschiet suenter las vacanzas da Nadal.

Fan da ballapei

Marc va ell'emprema classa e quei fetg bugen. «El vegn suenter bein ed era far gymnastica ei negin problem», raquenta sia mumma. Igl onn vargau cantavi Marc cul chor d'affons e quei cun anim e plascher. In di seigi el denton vegniu a casa e hagi detg ch'el lessi calar. Sandra ha vuliu saver daco e siu feagl mesaun ha explicau: «Jeu less uss pli bugen ir a dar ballapei.» Aschia han ils geniturs contactau ils miedis e quels hagian manegiau che quei mondi bein, ils affons hagian aunc buca tonta forza da sittar ballas ch'ei pudessi far donn. Pli tard seigi ei da giudicar daniev la situaziun. «L'emprema ga silla piazza da ballapei hai jeu mess Marc ella fallida gruppa, numnadameins cun quels da scoletta», conceda Sandra riend. «En sia gruppa eis el per lunsch ora il pign, mo il trenader ha manegiau che quei mondi fetg bein», aschunta ella tut loscha da quei ch'il buobet contonscha cun sia ferma veglia.

Marc e la pandemia

Cu la pandemia ha entschiet, mava Marc aunc a scoletta (LQ ha rapportau ils 30 da mars 2020). Sco affon cun in organ transplantau s'auda il buobet tier la gruppa da resca da coronavirus. Quei ei denton negin motiv da vegnir en panica pils geniturs. La famiglia risguarda numnadameins gia adina reglas da higiena zun severas, era ina grippa fussi buca aschi flot per Marc. Aschia ha il virus buca cumplacau pli fetg la veta dils Bearths. In temps han ei semplameins desistiu sin visetas d'auters affons. Il lockdown han ils dus gronds buca saviu ir a scola e scoletta, quei hagi oravontut plaschiu al pign che havevi tschaffen che tuts erien a casa. «Cheu tier nus havein nus era en aschia ina situaziun tutta libertad, savein ir a spass empau dapertut e guder la natira», aschia *Sandra Bearth*. Ella e siu um *Fabian* ein vaccinai e boosterai. «Quei havein nus oravontut fatg per proteger Marc», declaran els. Mo co decidan ei per lur affons? Il venderdis ein els vegni contactai dil Spital d'affons a Turitg. «Ils miedis cusseglian a nus da schar vaccinar tuts treis buobs. Marc vegn vaccinaus el spital d'affons a Turitg. Jan e Luca mirein da schar vaccinar a Glion.»



Avon tschun onns ha Marc survegniu in narunchel d'in donatur e sa dapi lu viver ina veta relativamein normala.